

Nunatsinni Nakorsaaneqarfik

Angajoqqaanut paasissutissiissut

Toqqusaarlunneq (tonsillitis acuta-scarlatina)

Toqqusaarluttoqarsimamm angajoqqaatut nappaatip tuniluussinnaaneranut annikillisitseqataasinnaavutit. Ilitsersuut atuaruk meeqqallu nappaammut ersiuteqarpat sulisut tamatuminnga ilisimatikkit.

Toqqusaarluut aniornininnerlu tappiorannartunik bakterissanik patsiseqarpoq.

Tappiorannartunik bakterissanik patsiseqartumik toqqusaarlunneq streptokok-inik patsiseqarajuttarpoq. Streptokokkit ilaat toorneeqqanik aappalaartunik aniorninitsitsisartumik toqunartuliortarput. Streptokok-inik patsiseqartumik toqqusaarluuteqarluni aniorneqalerneq skarlagensfeber-imik taaneqartarpoq.

Tunillatsinneq

Tunillannartuq qisermit assaat atortulluunniit tamatuminnga mingutsinneqarsimasut aqutigalugit (pinngussat, matut tigummivii assigisaallu) imal. quersornerup silaannakkut serpalinnerisigut siammaattarpoq. Inuk napparsimassutigingisaminik tunillatsissimasoq tunillaasuusinnaasarpoq.

Tunillaasinnaaffik: Meeqqap tunillatsinneraniit penicillin-imik nakorsartinnerata aallartinneraniit ullut marluk qaangiunnerisa tungaanut.

Pitsaaliuineq

Anersaartuutineersoq qiseq kakkilluunniit assannut avatangiisinullu pitsaalioruk.

Taamaammat assannut quersornallu tangajornak, kakkissarfimmulli pappiaqqamut allatullu ajornarpat talinnut quersorlutillu tangajortarit assatillu asallugit. Kakkissarfik pappiara ataasiarlugu atoreerukku saqqumitinnagu kaasarfimmitinnagulu igiguk. Qiseq attorukku assatit asakkit.

Eqqiluisaarneq qaffasissumik pitsaassuseqartiguk suulluunniit qaavi tagiagassat meeqqaalulu atorajunnerusaat aalajangersimasumik eqqiartakkit iperlu ersitsoq peerlugu eqqiaasarit.

Nappaammut ersiutit

Tunillatsinnermiit nappaatip ersiutaasa takkuttarnerat: Ullut unnuallu ataatsimiit pingasut.

Nappaammut ersiutit tassaapput kissarneqarneq, iisinermi anniarneq, toqqusaani qinersit qalippersimani nalinginnaasumillu peqqissutsip nappaammit sunnigaanera. Toqqusaani qinersit suangartarput ippinnarsillutillu.

Tappiorannartut bakterissat toqqusaarlummut patsisaappata virus-inik patsiseqartumit ersiutaat sakkortunerusarput.

Skarlagensfeber toqqusaarlunermik aallarniuteqarpat, ullut marlussuit qaangiunnerini aniornarit takkuttarput. Aniornarit naaniit aallartillutik timip sinneranut siaruuaattarput ilaatigullu qungaseq avatillu ilanngussinnaasarlugit. Kiinaq aappalorullersinnaasarpoq oqarlu aappillerluni.

Nunatsinni Nakorsaaneqarfik

Aniornerit meqquteeqqat kapputtakkat nuuisut ammalortutut atsigisut imminnut qanittuaraallutik ataatsimoortut ameq assigiimmik aappillersittarpaat (skarlagensrødt). Ameq panerluni siggilalersarpoq. Nakorsarneqarani sap. ak. ataatsip ingerlanerani aniornerit asinngartarput. Aniornerit takkunneriniit sap.ak. ataatsip marlulluunniit qaangiunnerini assanni isikkanilu ameq katagalersinnaasarpoq. Skarlagensfeber arlaleriarlugu nappaatigineqarsinnaanngilaq tappiorannartorli bakteria nappaammut patsisaasoq kingorna anionnertaqanngitsumik ass. toqqusaarluutaalersinnaavoq.

Nakorsartinneq

Streptokokkinik patsiseqartumik toqqusaarlunneq skarlagensfeber-ilu penicillin-imik nakorsarneqartarput.

Kingunerluutaasinnaasut

Toqqusaani qinersit aappaata tunua, iggiaq qungatsimiluunniit qinerseq ajuaqarfiulersinnaapput.

Navianartorsiornermut ersiutit

Anernilulerneq iisiniarnerullu ajornartorsiutaanera. Aatsarluarsinnaannginneq.

Meeqquerivimmukaqqinnissaq

Meeraq penicillin-imik nakorsartilernerminiit ullut marluk qaangiunnerini nappaammut ersiuteqanngikkuni meeqquerivimmukaqqissinnaavoq.